



ZABALOTEGI ARETOA ERABILTZEKO ARAUDIA

BERGARAKO UDALA

OHARRA: Dokumentu hau informazioa emateko helburuarekin eginda dago. Aldizkari ofizialetan argitaratutako testu onartuek bakarrik dute balio legala

Onartuta: Udalbatzak 2011/04/18an

Argitaratuta: Gipuzkoako Aldizkari Ofizialean 2011/07/04an

AURKIBIDEA:

1.- Xedea:	2
2.- Helburuak: zertarako erabili:.....	2
3.- Erabiltzeko modua	2
3.1.- Eskabidea, idatziz, 30 egun lehenago.	2
3.2.- Erakundeko arduraduna.	2
3.3.- Behar teknikoak	3
3.4.- Ordutegia:	3
3.5.- Uzte edo lagatzearen baieztapena.	3
3.6.- Erabileragatik ordaintzea.	3
4.- Zabalotegi aretoaren erabileraren arau orokorrak.....	3
5.- Eskatzailearen derrigorrezko eta ezinbesteko betebeharrak:	4
6.- Hutsegiteak.....	5
7.- Penalizazioak	6
Azken erabakia	6

ZABALOTEGI ARETOA ERABILTZEKO ARAUDIA

BERGARAKO UDALA

1.- XEDEA:

Bergarako udalarena den Zabalotegi Aretoaren erabilera eta funtzionamendua arautzea da ondorengo araudiaren asmoa eta helburua.

2.- HELBURUAK: ZERTARAKO ERABILI:

- Zabalotegi Aretoa kultura ekintzak, jardunaldiak, batzarrak etab. egiteko aretoa da.
- Ekimen horiek izango dira bai Udalak berak zuzenean antolatutakoak edo/eta elkarte edo enpresaren batekin batera, eta baita irabazi asmorik gabeko herriko talde, elkarte edo entitateek antolatutakoak ere, betiere Udalak horrela onartuko balu eta adieraziko zaizkien baldintzetan.
Bestelako talde, elkarte zein enpresak antolatutako ekimenak ere egin ahal izango dira, udalak eskaera aztertu eta baimena ematea erabakiz gero, eta adierazitako baldintzetan.
- Zabalotegi Aretoan ezingo da gune pribaturik sortu, ezta aretoa egoitza sozial bezala erabili ere.
- Dena den, Udalak antolatutako jarduerak izango dute lehentasuna beti, eta Udaletik kanpoko bi eskaera badaude, lehentasuna izango du eskaera lehenengo egin duenak.
- Atal honetan jasota geratu ez diren erabileren kasuak Alkateak edo honek eskuordetutako organoak erabakiko ditu.

3.- ERABILTZEKO MODUA

3.1.- Eskabidea, idatziz, 30 egun lehenago.

Aretoa erabili ahal izateko idatziz egin beharko da eskaria eta Udal Erregistro Orokorrean aurkeztu izenpetuta, gutxienez ekitaldia baino 30 egun natural lehenago

Eskaera egiteko Udalak prestatutako inprimakia erabiliko da derrigorrez. Inprimaki hori Udaletxeko Erregistro Orokorrean edo Udaleko web gunean eskuratu ahal izango da.

Eskaera aurkeztearekin ulertuko da eskatzaileak araudia ezagutu eta onartzen duela, eta betetzeko konpromisoa hartzen duela.

3.2.- Erakundeko arduraduna.

Inprimakian eskatzen diren datu guztiak bete beharko dira. Eskatzailea pertsona fisikoa den kasuetan ezinbestekoa izango da pertsona horren datu guztiak zehaztea inprimakian. Eskatzailea entitate, elkarte edo enpresa den kasuetan, bere datuez gain, haren ordezkariaren eta aretoan presente egongo den pertsonaren datu guztiak adierazi beharko dira ezinbestean.

Ordezkarria eta aretoan egongo dena bi pertsona diferente direnean azken hau izango da aretoko udaleko langileen solaskidea erabiltzailearen izenean.

3.3.- Behar teknikoak

Bai eskabidean bertan, bai eranskin batean, ekitaldirako behar diren baliabide teknikoak adierazi beharko dira (Aretoak ematen dituen aukerak aintzat harturik).

Argiztapena, soinu sistema edo beste baliabide teknikoen premia dagoenean Udalak bere giza baliabideak jarriko ditu horretarako.

Aretoak ez dituen baliabideak erabiltzaileak berak jarri beharko ditu eta bere kontura izango da horrek eragingo dion gastua.

Halaber, adierazi beharko du sarreren salmentarik dagoen edo ez, eta balego, prezioa.

3.4.- Ordutegia:

Eskaeran ekitaldiaren ordutegia adierazi beharko da (hasiera eta bukaera orduak) eta aretoaren erabilera ordutegia (hasiera eta bukaera orduak), eta muntatze eta desmuntatze lanak noiz hasi eta bukatuko diren.

Zabalotegi Aretoa, oro har, ondorengo ordutegi honen barruan erabili ahal izango da:

- Igandetik ostegunera: 09:00 – 22:00

- Ostiral, larunbat eta jai bezperatan: 09:00 – 24:00

Honek suposatuko du amaiera ordurako libre utzi beharko dela aretoa.

Dena den antolatutako ekintzaren arabera ordutegi hau murriztu edo zabaldu ahal izango du espresuki Udalak.

3.5.- Uzte edo lagatzearen baieztapena.

Aretoa erabiltzeko eskabideen aurrean Kultura Batzorde-buruak proposamena egingo dio Alkateari, edo honek eskuordetutako organoari; honek egoki iritzitako erabakia hartu eta hartutako erabakiaren jakinarazpena bidaliko zaio eskatzaileari. Bertan, eskaera onartzen bada, aretoa erabiltzeko baldintzen, ordutegiaren, eta bestelakoen berri jasoko du eskatzaileak idatziz.

3.6.-Erabileragatik ordaintzea.

Aretoa erabiltzeko udal baimena eskuratzeko, besteak beste, dagokion tasa ordaindu beharko da, udal ordenantza fiskaletan jasotakoaren arabera. Tasa ordaintzetik salbuetsita egongo dira irabazi asmorik gabeko herriko talde, elkarte edo entitateak.

Beranduenera ekitaldi eguna baino astebete lehenago egin beharko da ordainketa, Udaleko Diruzaintzan.

Epe horretan ez bada ordainketa egiten, baimena bertan behera geratuko da eta udalak kalte-ordainak eskatzeko eskubidea izango du.

4.- ZABALOTEGI ARETOAREN ERABILERAREN ARAU OROKORRAK

4.1.- Aretoa erabiltzeko baimena eman ondoren, Udala harremanetan jarriko da eskabidea egin duenarekin, behar diren alderdiak zehazteko.

4.2.- Kultura Zerbitzuak finkatuko ditu, ekitaldiaren ezaugarri teknikoak aintzat harturik, ekitaldia aurrera eramateko beharrezko diren langile teknikoak, atezainak eta bitartekoak.

4.3.- Zabalotegi Aretoko butaken muntatze eta desmuntatze lanez aretoa erabiltzeko eskaera egin duena arduratuko da. Langile horien arteko bat koordinatzailea izango da, eta bera arduratuko da aretoko arduradunarekin koordinatuta, aipatutako lanez. Bergarako Udalak Aretoa duen langileetako bat aretoan ez badago, inolaz ere ezingo da aretora sartu eskatzailea, aurrez Kultura Zerbitzuak horretarako baimen idatzia ematen ez badio behintzat. Ekitaldiaren ondoren aretoa jasotako moduan utzi beharko du eskatzaileak.

4.4.- Eskabidean segurtasun-arauak beteko dituela hitz eman beharko du eskaera egiten duen eskatzaileak, bereziki sua erabiltzeari eta ateak eta larrialdietarako irteerak oztopatzeari dagozkienetan, eta aretoko arduradunek ematen dizkioten jarraibideak aintzat hartu beharko ditu.

4.5.- Inolaz ere ezingo da gainditu aretoan gehienez sar daitezkeen pertsonen kopurua. Aretoaren gehieneko edukiera edo aforoa 120 pertsonakoa da.

4.6.- Debekatuta dago Zabalotegi Aretoa erretzea.

4.7.-Debekatuta dago, aretoak hartarakoxe jarritako lekutik kanpo, kartelak, pegatinak etab. jartzea. Halaber, eraikinaren hormetan, sabaian edo zutabeetan ezingo da panelik edo beste ezer jarri —ez iltzeekin ez zintzilik—, ez bada horretarako espresuki jarritako guneeetan. Eta ezingo zaie instalazioei, altzariei edo beste material batzuei ere inolaz eragin.

4.8.-Instalazioan ezingo da surik egin eta ez da baimenduko partikula goriak sortzen dituen jarduerarik, ez muntaia lanetan, ez entseguetan ezta emanaldietan ere, guztia arriskuen prebentziorako araudiak dioenari jarraituz.

4.9.-Udalak ez du inongo erantzukizunik hartzen beregain baimena eskatu dutenek jasandako istripuengatik edo beraien ondasunak galdu edo kalteak jasotzeagatik.

4.10.- Antolatutako ekitaldirako antolatzaileak aretoan jarritako pertsonala aretoko arduradunaren esanetara egongo da eta azken horrek aretoaren erabilera zuzena eta egokia emateko behar diren neurriak hartu edo/eta agindu ahal izango die.

4.11.- Burutu nahi den ekintza Jendaurreko Ikuskizunak eta Jolas Jarduerak arautzen dituen 4/1995 Legearen (edo etorkizunean lege hori ordezkutzen den legearen) menpe badago, lege horrek dioena ere bete beharko da, eta ez-betetzeak indarrean dagoen legeari jarraituz zigortuko dira.

4.12.- Arau hauek direla-eta edozein salbuespen egiteko, Udalaren idatzizko baimena beharko da.

5.- ESKATZAILEAREN DERRIGORREZKO ETA EZINBESTEKO BETEBEHARRAK:

5.1.- Baimendutako ordutegia errespetatzea.

5.2.- Aretoko altzariak errespetatu eta egoki erabiltzea.

5.3.- Aretoa egoki erabiltzea eta zaintzea.

5.4.- Aretoko ordena eta garbitasuna errespetatzea.

5.5.- Aretoan egingo den ekitaldiari buruzko soinu-zuko nahiz idatzizko iragarpen orotan Bergarako Udalaren laguntza izan duela adierazi beharko du, eta, haren logotipoa jarri. Publizitatea euskaraz izango da, edo elebidun, beti ere lehentasuna euskarari emanaz.

5.6.- Aretoa erabiltzearen ondorioz sortzen diren erreklamazioei erantzutea, Udalak egindakoei ere bai.

5.7.- Ikuskizunerako sarrerarik ez kobratzea Udalaren baimenik gabe, edo Udalak baimendutako baino prezio garestiagoak ez kobratzea.

5.8.- Aretoan egindako ikuskizuna dela-eta "Egile Eskubideei" dagokiona ordaintzea.

5.9.- 375 euroko fidantza jartzea. Fidantza hori gutxienez astebete lehenago jarri beharko da eta, jartzen ez bada, baimena bertan behera geratuko da eta udalak kalte-ordainak eskatzeko eskubidea izango du.

6.- HUTSEGITEAK

Hutsegiteak honela kalifikatzen dira:

a) Oso larriak:

1. Norbanako, elkarte edo talde batek Zabalotegi Aretoa egoitza sozial bezala erabiltzea.
2. Udalak izendatutako arduradunik aretoan izan gabe aretoa erabiltzea.
3. Aretoan dauden instalazioak arduragabekeriak erabiltzea.
4. Aretoko instalazioen bat erabilera okerraren ondorioz apurtu edo matxuratzea, edo ekitaldiaren ondoren aretoa ekitaldiaren aurretik jaso den baldintza berberetan ez uztea.
5. Udalari egindako eskaeran zehazten den emanaldirako ez, beste baterako erabiltzea aretoa.
6. Urte berean bi hutsegite larri pilatzea.

b) Larriak:

1. Udalaren baimenik gabe aretoa erabiltzea, pertsona edo ondasunak arriskuan jarritz.
2. Aretoa erabili ondoren zikin uztea.
3. Aretoko instalazioen bat apurtzea.
4. Aretoa erabiltzeko ezarritako ordutegia ez errespetatzea.
5. Ikuskizunerako sarrera kobratzea Udalak horretarako baimenik eman ez duenean, edo Udalak baimendutako prezioan baino garestiago jartzea sarreraren prezioa.
6. Urte berean bi hutsegite arin pilatzea.

c) Arinak:

1. Ikuskizunerako jarritako hasiera ordutegia ez betetzea.

2. Larria edo oso larria ez den araudi honen beste hutsegiteak.

7.- PENALIZAZIOAK

Zabalotegi Aretoa behar den bezala ez erabiltzeak eta aurreko artikuluan xedaturiko hutsegiteek dagokien penalizazioa izango dute:

1.- Araudi honetako hutsegiteak direla-eta, eskala honen arabera ezarriko dira penalizazioak:

a.- Hutsegite arinak: 750 euro arteko isuna eta/edo erabiltzeko baimena baliogabetzea eta, ondorioz, instalazioa erabili ezina 6 hilabetera arteko epean.

b.- Hutsegite larriak: 751 eta 1.500 euro arteko isuna eta/edo aurrerantzean aretoa erabiltzeko baimenik ez izatea, 2 urtera arteko epean, gertakarien larritasunaren arabera.

c.- Hutsegite oso larriak: 1.501 eta 3.000 euro arteko isuna. Eta aurrerantzean aretoa erabiltzeko baimenik ez izatea gutxienez 2 urteko epean

2.- Penalizazioak jarri aurretik, 10 eguneko entzunaldia emango zaio Aretoaren erabilerarako eskaera egin duenari, egindakoaren eta hauen kalifikazioa eta penalizazioaren proposamenaren berri emanez.

3.- Aretoan edo/ eta Udalari eta hirugarrenei kalteak eragin balira hauek ordaintzeko derrigortasunetik eta erantzukizunetik ez du salbuesten isuna ordaindu izanak eta erreklamazio honek bere prozedura eramango du.

4.- Araudi honetan ezarritako zigorren zenbatekoak Tokiko Gobernu Batzarrak proposatu eta Alkatearen dekretu bidez eguneratuko dira eta eragina izango dute ebazpenean zehaztutako datatik aurrera.

5.- Goian jasotako penalizazioak bateragarriak dira 4/1995 legeak dioena ez betetzegatik jarri daitezkeen zigorrekin.

AZKEN ERABAKIA

Araudi hau Toki Jaurbidearen Oinarriak arautzen dituen apirilaren 2ko 7/1985 Legean agindutakoaren arabera jarriko da indarrean.